

Blers purs ston vender vatgas – perquai ch'i manca pavel

Manar uss tar il mazler, e betg pir suenter la stgargiada – di l'uniun purila

CUN THOMAS ROFFLER HA DISCURRI
CLAUDIA CADRUVI / ANR

■ **Purs da la Bassa pavlan per part gia uss il muvel cun fain e pastg che fiss prevedi per l'enviern. Els ston prender mesiras d'urgenza e manar dapli biestga che auters onns en la mazlaria. Co sa preschenta la situaziun en il Grischun? Il president da l'uniun purila chantunala ha dà pled e fatg.**

Ston era ils purs grischuns laschar mazzar animals perquai ch'il pavel na basta uschiglio betg?

Thomas Roffler: Nus da l'uniun purila grischuna recumandain da reducir dad ina vart il muvel e da l'autra vart da cumprar vitiers pavel. Ins duess prender omaduas mesiras per betg surchargiar la fiera uschia che ils pretschs na crodian betg en il tschaler il davos quartal da l'onn.

Tegnan ils purs forsa memia bler muvel? U è la setgira la culpa?

Il dumber dal muvel è ils ultims onns stà pulit stabil ed ha varià mo pauc. Sch'ils purs laschan uss ir dapli muvel, ha quai segir da far cun il scart da pavel en consequenza da la setgira.

Dovri en l'avegnir, sch'i avess da dar dapli setgiras, ina redimensiun dal muvel?

La raccolta da pradas ed ers en il Grischun variescha magari e dependa fitg da l'aura. Segir è dentant ch'il dumber da muvel n'è betg stà memia aut ils ultims onns. Quai è era ina consequenza da la politica agrara. Cun lezza han ins gea gist era promovì l'alpegiaziun e nus constatain che las alps èn bainfrequentadas e gliez è bun.

Quants purs vulan uss laschar mazzar dapli animals? Per tge dimensiuns vai?

En Svizra constatain nus circa in augment d'ina terza da la biestga da maz. En il Grischun vegnin nus a sentir fin il davos da l'avust circa il medem augment. Positiv è che la fiera per charn cotschna è momentan anc buna e che



È sez sfurzà da vender tschintg vatgas – Thomas Roffler, president dals purs grischuns.

FOTO O. ITEM

charn bov vegn dumandada. Perquai cussegliain nus da manar uss ils animals ch'ins less laschar mazzar tar il mazler, e betg pir cura che tut vegn giu dad alp.

Vus schais che cumzunt vatgas vegnan vendidas. Ston ils purs era laschar ir auters tiers?

Pertutgads èn ils tiers che maglian pavel sitg sco fain e tirc. Lura per exempel era biestga manidla sco chauras e nursas.

Essas Vos sco pur pertutgà?

Jau mez sun era pertutgà. Cunzunt en il fund da la val avain nus fatg pli pauc raccolta e nus quintain da perder ina terza dal tirc. Gliez fa ora ina massa en las regiuns dal Grischun nua ch'i vegn cultivà tirc.

Quants animals stuais Vos laschar ir?

Jau hai in muvel da radund 50 chaus e stos quest atun probabel laschar mazzar tschintg animals.

E tschels onns?

Jau lasch en sasez mazzar be darar animals. E questa giada main'jau tar il mazler plitost vatgas che fan uschiglio era problems. Pli tard remplazz jau lura quellas cun ina vadella.

Prendan ils mazlers insumma anc vatgas? U han els gia avunda?

Nus essan drizads en bain en il Grischun. La vendita e fiera vegn organisada entras «GraubündenVIEH» che tegna il contact cun ils martgadants e cun las chasas da maz. La gronda part da la vendita da biestga va sur quest'organisasiun. Els organischeschan la fiera da muvel, procuran per ils transports ed han era la savida necessaria.

Quant dapli custa il fain ed il strom momentan?

Ina pitschna balla da strom custa da preschent enturn 30 francs e fain da buna qualidad radund 48 francs. Quai fa ora radund 20 fin 25 pertschient dapli che uschiglio.

Sch'i dess uss anc ina brava bugnada e faschess suenter bun'aura da crescher, fissi lura anc pussaivel da tuttina dumagnar en avunda pavel. U è questa stagiun gia persa?

La stagiun n'è anc betg persa. L'avust lavura la vegetaziun anc. I po tuttina anc crescher qua u là e cumzunt sch'ils animals turnan giu dad alp fissi impurtant sch'i dess anc pastg verd per ch'ils animals na stoppian betg ir giu dad alp direct en stalla.

«Nus stuain schar ir cun 30 nursas e 10 vatgas»

Quels dis planisescha *Damian Cadalbert* co vivant. Fin uss ha il pur da Sevgein racoltà ina terza damain pavel che auters onns ed i custass memia bler per cumprar fain e pavel per tut ses animals. «Nus avain radund 60 nursas e lezzas laschain nus ir giu sin la mesadad», di Cadalbert. Tar la biestga gronda na vul el en mintga cas betg dar davent animals giuvens uschia ch'el salva las vadellas, las sterlas e las mugias. Da las 73 vatgas da latg, inclus genetschas che fan vadè, sto el dentant laschar ir in buntant. El tscherna pli-

tost da las veglias che han insatge problems. Duas vatgas vuleva Cadalbert tuttina vender l'atun. Uss vegnan lezzas gia sin la proxima fiera a Cazas. Las autras van tar il mazler suenter la stgargiada d'alp.

«Anc sch'i faschess uss bun'aura ed i dess ina buna raccolta d'avust, na vegnissan nus betg da gulivar ora quai che nus avain pers», di Cadalbert. Fain per pavlar ils animals ch'el salva ha el gia empustà in pau. «Nus sperain che nus mitschian uschia – cun cumprar vitiers in pau fain e vender quests animals.»

30 raps pli pauc che l'onn passà

Il 20 d'avust mainan ils purs la biestga da maz sin la fiera a Cazas. Fin uss n'haja el betg anc retschavi dapli annunzias, ma ils purs s'annunzia per il solit pir l'ultim di, di *Christian Parli*. El è il director da GraubündenVIEH che organischa las fieras publicas a Cazas e Schiers nua che martgadants da l'entira Svizra cumpra biestga. «Nus essan pertscharts da la situaziun heiclia ma n'avain anc decidì naginas mesiras.» Ils proxims dis veglian ins prender decisions.

Quest'emna è il pretsch uffizial per la categoria da vatgas T3 crudà per 30 raps sin 8.20 francs per kilo pausa da maz. Ins quinta ch'il pretsch crodia vinavant las emnas proximas. L'onn passà era il pretsch da quel temp en la medema categoria anc tar 8.60 francs.

En las chasas da maz da la Bassa han ils lavurers per part stuì lavurar perfin l'emprim d'avust per dar da-

mogn. Co statti cun la capaciad dals mazlers locals?

Fin uss n'haja el anc mai gè il problem da survegnir memia bleras vatgas, chavras u nursas, di *Reto Zanetti* da Sent. «Nus essan cuntents per tut quai che nus survegnin. Noss salizs, las liongias ed ils schambuns èn fatgs cun charn svizra – era las pulpas. Nus na duvrain mai charn d'import. Perquai essan nus interessads da survegnir tants animals sco pussaivel.» I dettia bain emnas che las capacitads sajan cuntanschidas e ch'ins na possa betg mazzar dapli. Ma i na saja fin uss mai capità ch'ins avess refusà da cumprar giu. Ch'ils purs avessan vuli vender uss dapli animals che auters onns n'haja el betg senti, di Zanetti.

Era *Beno Pally* da Curaglia s'exprima sumegliantamain: «Anc uss n'hai jau senti nagut ch'ils purs avessan vuli vender dapli animals. En quindesch dis vesa quai forsa ora auter.» Lura turnia il muvel dad alp.



Charn bov è per cletg dumandada tar ils consuments. Tuttina vegn il pretsch per vatgas sut squitsch. Quest'emna è il pretsch gia crudà.

KEYSTONE